

## AICS NGEI MAI HI!!

*K. Lalrinzuala, M. Div- III*



Hunte a lo inher zel a tlumte thlir taka ka lo thlir thin, kan kohhran (BCM) Theological Seminary (AICS), kan lo chhuan ve em em zirna run bel tura a kawttual ka han rap ve ta mai chu an sawi Shekina Hill tih loh chi rual lo ni suh. AICS student han intih lek phei chu thil nuam leh chapo pui lek lekna tham hiala sawi nuam leh phurawm tak a la ni zui bawk nen.

An sawi AICS ngei maiah chuan zirna lamtluang chu ka han zawh chho zela, mikhual hmundanga an zina an inthlahrung dek ang mai hian kan han meng kiau mai a, senior students ten tih tur hrang hrang min han hrih chho a, a changa han then tlawk tlawk chang lah a tam. Amaherawhchu **AICS ngei mai hi** kan pi leh puten “*Aia upate zahthiamin an thute awihin zawm fo rawh*” tih nun zirna zawlbuk ngei mai chu lo ni leh zelin. Chaw ei a lo huna chaw ei dar a rik hma deuhah phei chuan chaw khawrh chak em em vang pawh ni chuang lo in, chaw khawrh hmasak loh hlau ang hrimin kawngkhar bul bangah chaw ei dar a rik hma deuh atangin kan han bet tai hlawm a. Zingah lah chhingmit kawpza rul tak chung leh mitek nuai nawk nawkin corridor kan han tifai ta mai thin kha, ka ti lo thei lo **AICS ngei mai hi** suangtuah phak loh leh kan tih loh tur anga kan lo ngaih thil tha tin reng min tih tira, hmasawna kailawn min zawh tirtu zirtirtu tha, chawimawina nopui dawng tlaka zirnite min chawi lian a, hma lam pan zel tur leh hman tlaka min chher tu a lo ni.

Tichuan kan zirtur tul te kan han zir chho zel a, hriat ngai reng reng loh Greek leh Hebrew thlipuite, history, theology hrang hrang thlipui ten min han nam sawk sawk chang phei chuan, Lalpa hetiang zir lo leh hre lo pawh hian min hmang theiin, I rawngbawlina kawng hi a zawh theih tho a ni law'm ni tiha puanthuah tela chhuah san vang vang chak chang lah tam.

Mahni tawk theuha *Thimhlim bak chhe len* nuam tih hun lai valualte kan tih tur assignment hrang hrangte tiin *thimhlim bak chhe len* chu khawi lamah, assignment, paper presentation leh programme hrang hrang tih tur hlirin min han delh chang phei chuan nisa hnuaia hnathawh kher ngai lo hian mit, taksa leh lu a nain a va han hai duh ber bur thin em. Compound chhungah phei chuan miin kan tawng hi an hre ve ang tih hlau ang leh zan rei lama tlangvalin an bialnute zawi leh thawp taka an biaka inbiak chang lah tam, eng dang vang a ni lo English a tawng ngei ngei ngaihna AICS campus-ah kan awm tlat. Hna han thawk ila, Mizo pa kha English hmang chungah hnathawh leh infiam ngai, thenkhat saptawng lama hnufual tan phei chuan, Bible-in, ‘mi a pawh a ngawih reng

chuan mifing a ni' a tih ang deuh khan, kei atan erawh zawng tawng ve loh hi a tha a ni tih nun neih pawh thil awl tak a va ni thin em. English medium school thaa kalna tur nei lote tan pawha English tawng zirna hmun lo ni leh zel bawk nen. A ni, AICS hi huap zo zirna hmun, nunphung hre lem lote tan hlei hleia chhungkaw nundan mawi min zirtirtu duhawm leh tha, kawngdika min hruaia, kan tum kan hlenchhuah theih nan thahnemngaihna rilru min neih tirtu chu AICS ngei hi a lo ni.

AICS ngei mai hi a ni, hriat ngai loh leh hmuh ngai loh zoram chung leh pawn thlenga hmelhriat, thian tha siamna run inpui lo niin, "*Semsem dam dam ei bil thi thi*" tih nun nula leh tlangval rualten, a thlum a al ei zaa lungual taka kan lawina run in nuam leh zahawm. Krista leh kohhran tan tia, Setana lal ram ti chhe tura Pathian ralthuam famkim, thlarau ngunhnam leh rinna phaw laa, remna Chanchin Tha inbuatsaihna kan kea buna kan din nghehna tura min chawi liantu ngei a lo ni. Aw!! he AICS ngei mai hi a ni, khawvel tehna atanga tling lo turte van Pathian hmaa mitling kan nihzia min pholanna hmun ngei mai chu.

Mizo rilru tak pua, mizo hla lo chuan thinlung, rilru a khawih thei lo ti a, 'Joy to the world the Lord is come' tih ai a 'Khawvel lawm nan a lo kal a' tih ngei mai hian rilru a kawih zawk ti a, sa lui ngar ngar thin kha, AICS ngei maiah hian a ni Thlarau Thianghlimin a hmun leh hun a zir zela tui taka tawng dang, hla pawh tui tak maia min sak tir a, Haleluiah, Amen! pe chhuak thei khawpa ka rilru, thinlung min her danglam sakna hmun, AICS ngei mai hi a ni ka tana Shekina Hill chu. Chhim leh hmar, chhak leh thlang atanga Lalpa leh a ram tana thawk tura in pe thalai rualte nena hlim leh lungual taka pheilai vawra tual kan chaina hmun nuam leh ralmuang, Kohhran bil bik awm lo, a hminga Kohhran member tawh phawtte chu *chhul khat kual* fa hrin ang maia, rilru zau taka Kohhran pawl bik awm tawh lohna kan ngaihnan leh duh dan hrang hrang kan inhrilhtawna leh Pathian kan fak ho theihna *shekina hill* ngei a lo ni.